

四庫全書

史部

欽定四庫全書

史部

浙江通志卷八十三

詳校官給事中臣戴璐

檢討臣德生覆勘

總校官編修臣倉聖脉

校對官中書臣袁文仰

謄錄監生臣蕭華

欽定四庫全書

浙江通志卷八十二

漕運下

行糧月糧

浙江本色行糧米貳萬陸千壹拾石捌斗捌升叁勺
貳抄捌撮柒圭陸粟叁粒壹黍陸粃貳糠叁粃本
色月糧米貳萬叁千陸百貳拾壹石壹升貳抄肆
撮壹圭柒粒四黍九粃壹糠肆粃遇閏加徵米貳

千叁拾叁石壹斗叁升陸合柒勺柒抄玖撮捌圭
九粟貳粒伍黍捌糠陸粃經費食米柒千玖百叁
拾捌石

以上共徵本色行月糧米肆萬玖千陸百叁拾壹
石捌斗玖升叁勺伍抄貳撮捌圭柒粟陸黍伍粃
叁糠柒粃遇閏加徵米貳千叁拾叁石壹斗叁升
陸合柒勺柒抄玖撮捌圭玖粟貳粒伍黍捌糠陸
粃經費食米柒千玖百叁拾捌石

杭州府

錢塘縣本色行糧米陸百壹拾壹石陸斗陸合本
色月糧米貳千貳百貳拾伍石壹斗捌升貳合肆
勺伍抄玖撮肆圭柒粟陸粒玖黍遇閏加徵米貳
百玖拾叁石陸斗肆升玖合伍勺捌抄肆撮叁粟
捌粒壹黍

仁和縣本色行糧米壹千肆百肆石玖升叁合本
色月糧米伍千叁百貳拾叁石叁斗捌升柒合玖

勺壹抄貳撮貳圭捌粟玖粒柒黍遇閏加徵米肆
百壹石壹斗貳升陸合肆勺玖抄柒撮肆圭陸粟
叁粒叁黍

海寧縣本色行糧米壹千肆百捌拾肆石柒斗柒
升貳合本色月糧米叁千捌拾伍石捌斗叁升伍
合叁抄玖撮柒圭叁粟壹粒叁黍遇閏加徵米壹
百捌拾玖石叁斗陸升陸撮貳圭壹粟捌粒柒黍
富陽縣本色行糧米壹百肆拾玖石陸斗肆升捌

合貳勺貳抄肆撮肆圭肆粒遇閏加徵米貳百叁拾肆石玖斗貳升叁合壹勺陸抄陸撮捌粟肆粒叁黍

餘杭縣本色行糧米叁百肆拾柒石壹升壹合本色月糧米肆百玖拾陸石捌斗叁升叁合壹勺捌抄玖撮陸圭叁粟柒粒壹黍肆廩陸糠柒粃遇閏加徵米柒拾伍石叁斗捌升叁勺壹抄肆撮柒圭肆粟陸粒壹黍

臨安縣本色行糧米壹百叁拾捌石捌斗肆合本
色月糧米貳千叁百伍拾玖石肆斗捌升捌合壹
勺玖抄柒撮陸圭伍粟貳粒伍黍貳粳遇閏加徵
米壹百柒拾柒石玖升捌合柒勺貳抄貳撮玖圭
玖粒貳黍捌糠陸粃

於潛縣本色行糧米陸拾玖石肆斗貳合本色月
糧米玖百陸拾玖石叁斗叁升壹合肆勺貳抄捌
撮伍圭貳粟肆粒捌黍遇閏加徵米柒拾壹石肆

斗壹升捌合叁勺捌撮肆圭柒粟伍粒貳黍

新城縣本色行糧米陸拾玖石陸斗伍升柒合叁
勺貳抄捌撮柒圭陸粟叁粒壹黍陸粳貳糠叁粃
本色月糧米壹千肆百肆拾玖石陸斗柒升叁合
玖勺陸抄肆撮叁圭壹粒陸黍遇閏加徵米壹百
伍石陸斗伍升柒合捌勺叁抄肆撮叁圭肆黍

昌化縣本色行糧米肆拾柒石柒斗壹升肆合本
色月糧米陸百肆拾伍石陸合陸抄壹粟玖粒貳

黍貳粳肆糠柒粃遇閏加徵米肆拾壹石捌升貳
合伍勺玖撮貳圭貳粟柒粒伍黍

通計杭州府屬本色行糧米肆千叁百貳拾貳石
柒斗柒合叁勺貳抄捌撮柒圭陸粟叁粒壹黍陸
粳貳糠叁粃本色月糧米壹萬捌千貳百玖拾叁
石捌斗叁升陸合柒勺柒抄陸撮叁粟柒粒壹黍
玖粳壹糠肆粃遇閏加徵米壹千伍百捌拾玖石
陸斗玖升陸合捌勺肆抄叁撮肆圭陸粟貳粒捌

黍捌糠陸粃

嘉興府

嘉興縣本色行糧米貳千伍百肆拾石壹斗陸升
伍合本色月糧米貳千壹百貳拾石伍斗貳升伍
合貳勺貳抄伍撮過閏加徵米壹百柒拾陸石伍
斗壹升肆合伍勺陸抄捌撮捌圭經費食米壹千
捌石

秀水縣本色行糧米貳千貳百壹拾陸石肆斗經

費食米捌百捌拾貳石

嘉善縣本色行糧米貳千肆百柒拾貳石柒斗壹
升貳合本色月糧米捌百柒拾玖石貳斗肆升貳
合壹勺陸抄陸撮貳圭貳粟柒粒壹黍遇閏加徵
米柒拾叁石壹斗捌升捌合玖勺陸抄柒撮伍圭
柒粟貳粒玖黍經費食米捌百捌拾貳石

海鹽縣本色行糧米壹千肆百伍石叁斗玖升叁
合經費食米陸百叁拾石

石門縣本色行糧米壹千叁百肆拾肆石陸斗陸
升柒合經費食米伍百肆石

平湖縣本色行糧米壹千肆百陸拾叁石叁斗肆
升肆合經費食米伍百肆石

桐鄉縣本色行糧米壹千壹百叁拾陸石肆斗陸
升經費食米叁百柒拾捌石

通計嘉興府屬本色行糧米壹萬貳千伍百柒拾
玖石壹斗肆升壹合本色月糧米貳千玖百玖拾

玖石柒斗陸升柒合叁勺玖抄壹撮貳圭貳粟柒
粒壹黍遇閏加徵米貳百肆拾玖石柒斗叁合伍
勺叁抄陸撮叁圭柒粟貳粒玖黍經費食米肆千
柒百捌拾捌石

湖州府

烏程縣本色行糧米貳千捌百貳拾肆石捌斗捌
升肆合本色月糧米壹拾柒石捌斗陸升壹合肆
勺肆抄叁撮壹圭伍粟叁粒柒黍遇閏加徵米壹

石肆斗捌升陸合捌勺壹撮捌圭玖粟陸粒叁黍
經費食米壹千壹百叁拾肆石

歸安縣本色行糧米貳千陸百叁拾叁石陸斗貳
升壹合本色月糧米叁拾貳石捌斗陸升柒合陸
勺貳抄陸撮柒圭壹粟陸粒壹黍過閏加徵米貳
石柒斗叁升伍合玖勺叁抄叁撮陸圭叁粟叁粒
玖黍經費食米玖百肆拾伍石

長興縣本色行糧米壹千陸百壹拾石貳斗叁升

肆合本色月糧米壹百玖拾壹石柒斗叁升壹合
陸抄柒撮貳圭陸粟貳粒伍黍遇閏加徵米壹拾
伍石玖斗伍升玖合捌勺捌抄捌撮貳圭叁粟柒
粒伍黍經費食米肆百肆拾壹石

德清縣本色行糧米壹千肆百柒拾叁石玖斗貳
升捌合本色月糧米壹拾貳石陸斗柒升陸合伍勺柒
抄叁撮捌圭肆粟伍粒伍黍遇閏加徵米壹石伍升伍
合貳勺壹抄壹撮伍粟肆粒伍黍經費食米伍百肆石

武康縣本色行糧米叁百貳拾肆石柒斗伍升玖
合本色月糧米玖石玖斗柒升肆合肆勺玖抄壹
撮伍粟壹粒玖黍遇閏加徵米捌斗叁升貳勺玖
抄貳撮柒圭肆粟捌粒壹黍經費食米壹百貳拾
陸石

安吉州本色行糧米貳百肆拾壹石陸斗陸合
本色月糧米叁百叁拾玖石叁斗柒升壹合
肆勺陸抄伍圭伍粟陸粒肆黍遇閏加徵米貳

拾捌石貳斗伍升陸勺貳抄捌撮壹圭肆粟叁粒
陸忝

孝豐縣本色月糧米壹千柒百貳拾貳石玖斗貳
升叁合壹勺玖抄肆撮貳圭伍粟柒粒壹忝遇閏
加徵米壹百肆拾叁石肆斗壹升柒合陸勺肆抄
肆撮叁圭肆粟貳粒玖忝

通計湖州府屬本色行糧米玖千壹百玖石叁升
貳合本色月糧米貳千叁百貳拾柒石肆斗伍合

捌勺伍抄陸撮捌圭肆粟叁粒貳黍遇閏加徵米
壹百玖拾叁石柒斗叁升陸合肆勺伍粟陸粒捌
黍經費食米叁千壹百伍拾石

漕運官制

總理漕運總督

浙江巡撫兼理漕務

浙江督糧道專轄糧運

監兌杭嘉湖府廳官各一員

押運同知通判一員

大清會典順治初年設漕運總督一員駐劄淮安又設漕儲道一員專轄糧運十年裁漕儲道添設浙江糧道一員輪徵輪解凡督徵漕糧修造船艚僉運交兌督押鈐束領運官丁俱係糧道職掌別衙門不得干預有勢要把持及不服鈐束者聽其指實奏

聞撰給

勅諭十二年戶部覆准漕運錢糧盡歸糧道專管十五年裁浙江糧道一員復設漕儲道一員十六年覆准漕儲道催重價空糧道專司僉選追比督運諸務十七年覆准糧道不得別委使專司漕務毋誤職掌康熙四年裁漕儲道六年覆准推官既裁監兌漕糧於各府同知通判內選委

雍正六年十月戶部為敬陳管見等事議覆浙江糧道蔡仕彤條奏浙省漕白二十一幫例就通省

同知通判輪流遴委三員分幫管押俱於糧船開行方到幫次米色非其經手得與監兌官互相推諉責任不端弊端難絕臣愚以為監兌押運宜令一員兼司每遇十月開徵新漕以前兩月就通省丞倅中遴選三員詳本省督臣批委着令自帶衙役數名分赴三府監兌兌畢即令管押赴北庶米色俱經手選無所推諉沿途亦必嚴加管束不虞攙和等語查抵通交卸米石或米色不純押運官

每推諉於監兌而監兌之員又以途中攙和為詞
今若一員總領監兌押運之事更無可推諉卸責
之處則兌運之時必精選好米運糧之時亦必嚴
謹管束無攙和偷換之弊應如所奏行文總漕令
有漕各省一體遵行可也奉

旨依議

雍正九年十二月戶部為請

旨事臣等查得倉場侍郎岳爾岱等疏稱押運官弁養

廉移咨有漕各督撫逐一確查去後今准浙江總督李衛覆稱押運通判每員給養廉銀四百兩查押運官員給銀之處皆仰體

皇上慎重漕務矜惜官丁之至意嗣後押運官員如有額外扣剋等弊指名題叅嚴加議處具題前來應如倉場侍郎岳爾岱所請令各省有漕督撫照所議之數給發可也奉

旨依議

運糧官丁

浙江督糧道屬

杭州前衛 杭州右衛 紹興衛 寧波衛 台

州衛 溫州衛 處州衛 海寧所 湖州所

嘉興所 嚴州所 衢州所 金華所

凡漕糧共一十九幫每幫二員循環輪流領運共
三十八員內守備三員千總三十五員押空隨幫
官每幫一員共一十九員又嘉湖二府白糧幫每

幫領運千總二員循環領運押空隨幫官二員

守備每員給俸工銀一百五十兩七錢六釐

閒運俸工

在藩庫支給

本色行糧米一石五斗折色行糧銀一兩

八錢

千總每員給俸工銀九十兩

閒運俸工在藩庫支給

本色行

糧米一石五斗折色行糧銀一兩八錢

押空隨幫每員支給廩工銀五十四兩本色行糧

米一石五斗折色行糧銀一兩八錢

白糧千總每員給俸工銀七十九兩二錢

白糧押空隨幫官每員給支廩工銀五十四兩給
本折行糧銀三兩六錢

順治三年定每衛設掌印守備一員千總一員俱
係部推百總一員係外委衛軍改為屯丁其漕運
造船事務令都司分轄四年覆准領運千百總如
有不足聽總漕巡撫照幫酌選委用八年覆准漕
糧侵欠皆因僉選官軍不得其人宜慎選運官清

查舍餘班軍營軍屯丁黃快船丁及充各衙門書吏承差俱令僉選毋得規避十二年覆准各省殷實屯丁或竄入民籍希圖免運或運弁賣富差貧或小民鄰近運衛勾攝擾害令督撫責成道員分別軍民開除補足五年一次編審造冊又覆准運糧每丁管船一隻不得詭名僉報缺丁誤漕

康熙五年戶部題准各省經制百總出運給俸俾運住支九年覆准凡運糧先就本衛官輪派不足

方及他衛隨幫各弁亦應均輸如有任意顛倒索
詐鑽營情弊總漕該督撫題叅二十五年覆准各
省運丁每船多寡不一江寧等衛每船十二名蘇
太鎮金松五衛所每船十一名惟江西湖廣山東
每船十名令畫一裁減江南浙江運丁俱照江西
湖廣山東例每船額設十名

雍正元年十二月初九日欽奉

上諭

恭紀
首卷

漕船除本船正副旗丁外其頭舵水手務於

衛所本軍內擇其能撐駕者充當

雍正二年十一月署浙江巡撫事河南巡撫石文焯會同福浙總督滿保題為遵

旨議覆事臣准部咨欽奉

上諭內地衛所歸併州縣飭令分別詳悉區畫具奏欽此查浙省漕白二十一幫需用守千四十二員內有寧紹處三衛守備三員海寧所千總一員亦在遞年輪流領運每遇陞遷事故僉運不敷即於屯

員內選委代運是領運弁員勢不可缺無庸置議
至杭州前右海寧台溫等衛掌印守備五員嘉湖
衢嚴掌印守禦所千總四員均有統轄屯漕編丁
僉運清理漕欠之責其所轄人丁戶口錢糧難以
偏廢且浙省屯田派給各幫旗丁贍運實屬運田
有一縣之田派於數衛所者有一丁之單撥於數
州縣者田地幫次遠近不同是以各丁應完錢糧
向在該衛所就近投納若將屯糧併入州縣則一

幫一丁應納錢糧勢必零星割裂分縣投納往返
奔馳在各丁以船為家春去冬回趲運不遑焉能
兩顧而縣令又不能出境遠離逐幫按丁追催況
一丁之田坐分數邑若責各縣各催萃於一幫一
丁更難免拘擾滋弊且恐奸丁規避竄入民戶難
以稽查漕白僉丁輓運莫及必致有悞是浙省衛
千所轄人丁戶口錢糧均關漕運應照舊分隸無
庸議裁併入州縣者也所有杭州前衛前右二所

杭州右衛中右二所海寧衛左所台州衛右後二
所温州衛左右二所分徵千總共九員查無漕運
之責且錢糧無多既有衛備可理相應裁去其員
下事務原係該衛分出應仍歸衛備經理可也奉
旨該部議奏隨經戶部以應如所奏議覆奉

旨依議

雍正八年正月浙江總督管巡撫事臣李衛為

聖恩溥被請

旨欽遵事竊查領運漕糧之衛所弁員向例分別輪運
停運給與廩工俸薪其中原有等差固已均沾祿
養但各員領運之年既有長途盤費卽逢停運亦
有家中養贍從前因所入不敷多與兌糧州縣需
索陋規有司之不肖者卽轉派於民加收苛索彼
此分潤否則憎嫌米色講究幫貼常至縣衛互爭
稽遲兌限臣抵浙以來力禁州縣之漕規以制衛
弁之啟釁又慮南北輸輓弁丁亦有艱難將各衛

門相沿運幫陋例嚴行裁革從前借欠銀兩屢籲
聖恩分年帶運俾之稍得紓徐數年之中縣衛相安扣
項漸清重運無悞今歲漕船比往年早開一月之
期現在頭幫已將過淮惟各幫運丁每船尚有出
銀數兩餽送押船之員名為幫規以為運弁盤費
使用各弁因舍此別無可取歷年相沿授受而運
丁因得藉以挾制沿途私裝盜賣竟無顧忌實於
漕政有碍臣愚昧之見必須徹底革除幫規但不

酌經久養廉則窮弁難以支應必致名去實存現
今江西各運弁已蒙

聖恩賞給養廉倘蒙循照江西之例則浙江衛所除徵
屯之員尚有些須耗羨外其二十一幫按年領運
之弁每年給銀二百四十兩應銀五千四十兩不
輪運之官每員給銀一百兩應銀二千一百兩又
隨幫各弁更為微員押坐回空是其需責每官議
給銀四十兩共該銀八百四十兩在江西於藩庫

備公銀兩取給而浙省則從前蔡仕舛因道庫收
存銀兩未留交下起解運費曾於漕截銀內按兩
提耗二分每年共銀五千三百四十七兩抵作解
費原在十四萬兩耗羨之外者議於辛亥年冬月
補足之後將此銀統歸藩庫備充公用今若以漕
耗抵給運弁養廉亦屬於本款中以公濟公除外
每年不敷之二千六百餘兩并規運及庚戌辛亥
兩年各全缺銀七千九百八十兩查前經奏明通

省十四萬兩耗羨之外或本年完納數多或徵收
歷年舊欠所有餘耗盡收撥補將一切運丁幫規
徹底釐革再有陽奉陰違嚴叅加倍治罪則運弁
有養廉之資幫丁無挾制之弊於漕務似有裨益
是以循例奏明請

旨奉

旨好支給可也咨部存案

漕船

浙江漕船一千八十二隻

白糧船一百二十六隻

浙省原額漕船係一千四百四十一隻因節省減存歷年久遠船身朽爛無存於雍正四年總漕張大有題定一千二百一十五隻作為定額但歷年仍有增減不一現在雍正九年浙省起運八年分漕白二十一幫實在出運漕白船共一千二百八隻

漕船每隻支本色行糧米一十五石折色行糧銀
一十八兩本色月糧米四十八石遇閏加徵米四
石折色月糧銀三十三兩六錢遇閏加給銀二兩
八錢三修銀七兩五錢為修艙船隻之用每漕截
裝正米并交倉二五耗米一石給漕截銀三錢四
分七釐其沿途一五耗米不行支給

白糧船每船照漕例支給外又支給食米三十一
石三斗該折給銀四十一兩一錢六分

歲運漕船每隻給銀二百八兩七錢七分三釐十年滿號詳請再造

每船原裝正米四百石外多載一石給銀五分名曰負重耗米例不支給

每船許帶土宜一百二十六石

每船回空漕河各督撫嚴檄鎮道等官無分晝夜催回以副冬兌冬開之限

康熙四十九年戶部為窮丁困苦等事議覆浙江

巡撫黃東中疏稱浙省運白旗丁俞恒等懇將四
十三年江南旗丁包謝國叩

閹裁減經費錢糧並給丁米九十七石二斗照舊給發
一案臣即行糧道據程鑾詳稱浙省白糧原係民
間解運費用甚多除額編銀兩外民間仍津貼銀
四萬四千九百餘兩後改為官運照常津貼自康
熙三年停止官運永選漕船交與旗丁運送每船
給運軍經費等銀五百一十三兩零又給旗丁每

船飯米九十七石三斗前項銀米並非額編之項
俱係民間津貼懇祈

勅部議覆施行等因查前項給丁白糧經費銀五百一
十三兩內於四十三年旗丁包謝國等情願捐造
船隻等因叩

閩臣部議將經費銀五百一十三兩內裁減銀一百八
十餘兩至運白旗丁往來所用食米九十七石三
斗亦併裁革照漕例支給米六十三石在案但前

項裁銀一百八十餘兩俱係從前旗丁包謝國等
情愿捐造船隻臣部具題裁減之項並非應給旗
丁之正項相應將前項銀兩仍照原題裁存解部
至裁革旗丁往來所用食米今該撫既稱前項米
石並非額編正項俱係民間津貼應照該撫所題
支給可也奉

旨依議

雍正二年五月戶部奉

上諭朕惟漕運關係甚大經費本無不敷運丁恣行不法皆由官弁剝削所致如開兌之時糧道給發錢糧任意扣剋運丁所得十止八九而僉丁之都司監兌之通判又多誅求及至開行沿途武弁借催償為名百計需索又過淮盤查私貨徒滋擾累究為無益運丁浮費既多力不能支因而盜賣漕糧偷竊為非無所不至矣嗣後各省糧道給發錢糧不許扣剋分釐沿途武弁不許借端需索運丁除包攬抗違外所帶

些須貨物亦無容苛刻盤查至江浙船政同知經管
修造糧船侵漁尤甚此官於漕政毫無裨益著即裁
去爾部行文各督撫不時查察如有仍前需索等弊
立即指叅從重治罪庶運丁漸有起色自必保守身
家凜遵約束禁官弁之侵削即所以戢旗丁之刁悍
也特諭

雍正二年五月戶部為請定歲造等事先經總漕
張大有疏稱各省現存漕船數目准部文行令徹

底清查造冊題明分送部科查核今據江安糧道馬世珩等各造清冊詳送前來相應具題臣部以該督疏內原額漕糧與漕運議單開載船數不符移咨該督逐一查明分晰減存積缺并洒帶漂豁船數另行造冊送部去後今送到冊內浙江糧道蔡仕卬詳開浙省額設漕船以來歷經久遠案卷霉爛無從稽考今照上年所送冊開原奉單派船一千五百五十八隻內灰石減存洒帶零船三百

四十三隻現運船一千二百一十五隻造送查核
前來查糧道造送船隻與近年出運船數查對相
符應令該督嗣後將此題定實在現運船數作為
定額內除旗丁自備船隻例不給料價外其餘現
運漕船每年將滿號之船俱照十分之一咨部請
造如有可以加修出運者仍令加修出運不得將
堪以加修之艘混請成造致滋浮冒可也奉

旨依議

雍正七年五月奉

上諭朕聞各省糧船過淮抵通之時該管衙門官吏胥役人等額外需索陋規以致繁費甚多運丁重受其累特命御史前往稽查禁革苛索等弊又查向來之例每船北上許帶土宜六十石朕思旗丁運駕辛苦若就糧艘之便順帶貨物至京貿易以獲利益亦情理可行之事著於舊例六十石之外加增四十石准每船攜帶土宜一百石永著為例惟是運丁等繁多

素有惡習如偷盜米石掛欠官糧夾帶私貨藐視法紀向來之通弊也又如昔年浙江湖廣二省糧船因私怨小怨遂致操刃持戈殺傷多命又從前偶值回空守凍遂至縱容水手公然搶奪擾害居民此皆衆所共知者是以數年以來內外臣工條奏旗丁不法者不下數百紙前又有人奏稱販賣私鹽之弊在糧船為尤甚有一種積梟巨棍名為風客慣與糧船串通搭有貨物運至淮揚托與本地奸徒令其賣貨買

鹽預囤水次待至回空之時一路裝載其所售之價則風客與丁舵水手三七朋分糧船貪風客之餘利風客恃糧船為護符於是累萬盈千直達江廣私販日多官引日滯等語觀此則旗丁之作奸犯科誠難以悉數也朕年來屢飭該管官嚴行禁約又復念其勞苦疊沛恩膏近見伊等之惡習刁風亦漸悛改是以特頒諭旨嚴禁過淮抵通之陋規復令增添攜帶土宜俾得多沾餘潤以贍家口伊等益當感戴朕恩

遵守法度共為良善以免罪愆着總督倉場侍郎漕運總督將朕此旨通行刊布每船各給一張使運丁人等觸目警心以副朕體恤訓誨之至意特諭

雍正八年六月戶部議准每船頭舵二人每人准帶土宜三石水手無論人數准共帶土宜二十石如二十六石之外再有多帶者嚴加議處

雍正十一年九月戶部為請嚴查驗糧船等事查漕船定例十年輪造除將舊船底料配用外運丁

仍赴道庫領銀二百八兩以為料價之用總漕委
官監造工完將委官匠作姓名并成造年月刻鑿
船尾總漕驗烙如有板薄釘稀或將滿號舊船粘
補掩飾者監造官嚴加處分法至備也今河臣朱
藻疏稱各衛守備徃徃串通旗丁將造船料價領
回分肥並不拆造只用油灰麻觔畧加粘補故意
遲延到次駁換不及只得聽其兌開易至沉溺請
勒限以十月十五日前將完造新船到次候兌

以憑查驗如仍係舊船庶便責換過期不到即行
題叅議處等語查各省漕船河道遠近不同若湖
廣江西浙江三省漕船約於八月內始能全數回
空沿河官弁縱極力催儻亦須十月內方得到次
再加拆造亦需時日若限十月十五以前到次勢
必不能況勒限完工不免草率不能堅固與舊船
無異況冬兌冬開為期無幾即令十月十五以前
果能到次於此時駁換拆造勢必悞運應將該督

所請毋庸議嗣後令總漕巡撫恪遵成例申飭各糧道將十年滿號之船先期請造預備物料原船到次卽刻委官興工監造毋悞冬兌冬開倘有將滿號船隻匿不請造遲延者將衛備叅革造完之後糧道務將新船查驗於船尾大書深鑿成造年月與委官匠作姓名如有將舊船粘補掩飾及造不如式者監造之官及衛備旗丁一併嚴審究擬照例賠造倘糧道不親查驗及徇隱不行揭報該

總漕巡撫題叅議處再疏稱沉溺失風米石着落
不行查出之大小各員分賠等語漕船偶有失風
沉溺虧折米石定例責令旗丁賠補原欲使之凜
畏法紀盡力撙節小心防護若令經管各官分賠
恐旗丁恃有新定之例不特疎於防護且啟偷蝕
米石假捏失風以少報多諸弊應將所請亦毋庸
議可也奉

旨依議

則例

凡給單總漕置造全單每年派某衛所幫官丁船隻應運糧數赴某府州縣領兌以糧艘到日為始限日支領月糧空船赴次開兌重船過關過壩到淮計程酌扣守風阻淺參謁較斛等期逐一限定填單每幫分給一紙運官及監兌官查款照月各於前件項下開註有無違限并官吏姓名用監兌印鈴記到淮日查算如違程限或罪在有司或罪

在領運官丁照數叅究責懲仍編幫改限嚴責如期入閘抵灣起糧完日全單繳送照例查比獎薦叅罰如不依式填註及填註不實者南聽總漕北聽倉場核叅總漕發單後糧道刊發號單每單兌米一百石併贈耗數目分頒各州縣每交完一單令運官填註收數一船兌足卽出給水程勒令開幫又頒發各屬每倉號簿開列丁船兌足註明如逾期不完監兌官據簿責比

凡樣米應運漕米州縣各將倉貯乾圓潔淨樣米
四升裝成二袋用印鈴封同兌米交付運官解送
倉督查核轉發坐糧廳及各倉比對米色驗收

凡水次交兌每年漕糧經徽州縣限十月開倉十
二月完兌官收官兌軍民兩不相見止令監兌官
與運官公平交兌兌完一船立即開行截殿配船
儘一廩米派兌一丁如有畸零米石方准湊兌別
船

凡運糧程限浙江限二月內過淮六月初一日到
通

凡運丁屯田混入民田及運丁轉售者盡令清出
分上中下三等造冊奏報按田派運浙江運丁按
屯田畝數配給領運船隻至無運衛所及無屯田
不願領運者不得妄行僉派應給運丁簞羨等銀
務查本丁上年全完無欠方准給發別幫別丁不
得混冒扣留簞羨等銀照餘米例查抵舊欠以三

年為止仍有餘銀盡數給還以示鼓勵

凡漂流定例江洋黃河漂流為大患勘實具題准與豁免如未經題報即於本丁名下追賠不足將本幫餘米簞羨等銀扣抵足數裏河漂流為小患不准豁免若二百石以上總漕巡撫查明具題准免曬颺仍令處補應納京倉糧米如漂流十石減除一百石改納通倉每石省脚米一斗以補缺額如漂流一百二十石免曬一千石每石省曬折米

五升并耗米七升以補缺額如數多抵補不敷扣除該幫羨餘銀兩該幫不足將該衛該總扣除務足原數

凡催徵漕糧完欠順治十三年戶部題准州縣衛所官未完不及一分者免議一分以上罰俸六個月二分以上者住俸三分以上者降二級四分以上者降三級五分以上者革職俱戴罪督催完日開復叅後違限不完者加倍議處又題准白糧經

徽州縣官完欠分數及叅後違限俱照漕糧例處
分十八年覆准行月經費雜項錢糧照正項錢糧
原定例處分

康熙十四年覆准漕糧改折銀兩與隨漕項下錢
糧各作分數題叅

凡運納漕糧完欠順治六年戶部題准運官擇殷
實才幹者加千總銜押運漕糧一年無欠實授千
總二年無欠加署守備三年無欠實授守備五年

無欠加都司僉書如有掛欠加等治罪追賠七年
題准官丁掛欠漕糧即遇赦不准豁免仍行究追
八年題准運官一運全完委用守備千百總俱准
實授二運全完各加銜一級三運全完各實陞授
一級十七年題准浙江糧道糧多全完者加陞一
級入覆准領運官除消算買補及隨幫帶運全完
者不叙外浙江糧多路遠部推守千百總全完者
每運加銜一級外委運官一運全完者紀錄一次

二運全完者准實授三運全完者加銜一級

康熙十一年題准浙江糧多路遠部推守千領運全完者每運加銜一級至銜所裁外委百總名色改為隨幫官浙江隨幫官隨運三次給千總劄再隨運二次以銜千總推用

凡監兌漕糧未完捏報兌完漕船未開捏報開行者各降二級調用

凡收兌漕糧攪和糠粃砂土及私自改折漕糧者

該管官俱革職監兌官降一級調用其抵通交兌漕糧有糠粃砂土者押運官革職糧道降一級調用

凡監兌官任蠹惡包攬橫行水次侵蝕漕糧者降二級調用或旗丁生事不能禁止者該管官降一級調用

凡押運官不候交完漕米未經掣批私自回任者罰俸一年

禁約

順治三年戶部覆准漕糧無論官儒民戶一體督催及時入厰候兌不得堆貯私家逼令官丁赴兌違者治罪七年覆准漕兌積弊四款一科派常例一濫差滋擾一苛勒贈耗一交兌畱難通行勒石禁革十年覆准漕米依限收完即給票歸農官兌軍收不許點兌倉頭私派耗贈勒碑永禁仍取具州縣遵依十五年覆准官收官兌軍民不許相見

有陽奉陰違查叅重處運丁擅自鼓噪有司能悍
禦者上司擬實題叙密訪各屬倉歇巨蠹及各衙
門常例弁丁淋失踢斛割單等弊題叅重處又覆
准運官領運漕船全單開載定數中途洒帶歸併
到通船少冒支行月水脚銀米嚴追完日仍從重
處分

康熙元年奉

上諭領運官丁多有不守成法夾帶私販貨物隱藏犯

法人口倚恃勢力行兇害人借名阻礙河道毆責平人托言搜尋失物搶劫民船且有盜賣漕糧故致船壞貽累地方嗣後仍有違禁肆行者督漕各官並該地方官即行叅奏嚴提官丁治以重罪若徇情不奏各官亦從重處治特諭

康熙十七年覆准禁革小民納糧時修倉鋪墊及屯丁領運行月扣除陋規違者叅究二十年覆准浙江運丁私勒民兌另立私截名色嚴行禁止

雍正二年閏四月十八日欽奉

上諭各省旗丁運糧進京沿途行走理應奉公守法乃數年前浙江湖廣糧船因懷挾私忿彼此爭鬪持戈放箭殺傷者多逞其兇頑肆行無忌又聞前歲冬間糧船守凍在山東地方竟行搶奪擾害居民去歲回空又聞強取百姓衣服此等皆大干法紀嗣後總漕若不嚴加約束禁止妄行仍然寬縱直隸山東河南巡撫即着轉飭沿河官弁不時稽察倘玩法為非即

分別輕重按律治罪不得稍有徇縱推諉以長刁風
若有如從前爭鬪傷人及搶奪擾民之事該督撫即
行奏聞請旨於彼處立刻正法決不寬貸可預先曉
諭各省運丁知之特諭

倉廩

浙江糧道杭嘉湖三府屬

錢塘縣便民倉

在調露鄉北新橋南河西水次

仁和縣便民倉

在豐河舊馬頭

海寧縣便民倉

初建於長安運河之東
關後徙於運河之西岸

富陽縣便民倉

在北關
蘇櫓橋

餘杭縣便民倉

在餘杭
縣東門

臨安縣便民倉

初在會城湖墅金魚池
頭後徙建於餘杭水次

於潛縣便民倉

在墅河
新馬頭

新城縣便民倉

在墅河
新馬頭

昌化縣便民倉

在墅河
新馬頭

嘉興縣便民倉

舊在澄海門外鴛鴦湖
傍後遷入城內鳳池坊

秀水縣便民倉

在縣東北望吳門內

嘉善縣便民倉

在縣西南一里許

海鹽縣便民倉

初設縣郊外後移於西門內

石門縣便民倉

初建南門外後遷於城內學河之南

平湖縣便民倉

舊在縣西一里臨水次後改建於北城之內

桐鄉縣便民倉

初在皂林鎮運河之南後移建於古接待院之址

烏程縣便民倉

在定安門內西岸

歸安縣便民倉

在定安門內東岸

長興縣便民倉

在縣城外東南水次舊教場基

德清縣便民倉

在峻明門二里外

武康縣便民倉

初在縣東北一十五里後移置縣東北一里臨後溪

安吉州便民倉

在梅溪口

謹按官兌興而悉索除長運行而踐更息其收貯民粟以出兌於軍者惟倉殿為重故便民有倉誠輸輓之所係也今考杭嘉湖三府便民倉歷年建革不一據各縣志所載備列於左其預備常平社義等倉乃儲粟以贍軍賑民者已見積貯門茲不復錄

運河

浙江運道由杭州府之武林驛北歷湖州府德清縣東三十里凡百二十里而達嘉興府石門縣又東北歷桐鄉縣北八里凡八十里而經府城西繞城而北又六十里而接江南蘇州府吳江縣之運河陸某漕河志浙漕者浙西諸水發源於天目山而宣歙以東富陽以北支分幹流衆川為緯運河為經此浙江與江南下江之漕所由即宋時綱運之故道也自杭州北郭務至謝村北為十二里洋為塘棲河水深濶德清之水入之過北陸橋入石門縣界過松老抵高新橋海寧支河通之繞石門城南轉東北至小高陽橋河淺資開濬東過石門塘折而東為王灣至皂林水深者及丈過永新入秀

州界自趙牆鋪至陡門鎮河俱濶深北為分鄉鋪稍東為學繡塔又北由嘉興府城西轉而北出杉青閘至王江涇鎮河濶五六丈不等深者至二丈許北為平望驛東通鴛脰湖湖州府運艘自西出新興橋會之北至松陵驛由吳江縣至三里橋水淺不及丈然南有震澤北有黃天蕩水勢澎湃夾鋪橋屢建而北經蘇州府城東鮎魚口水由蟹塘入之北至楓橋水不及丈由射浦經許墅關過常州鎮江二府浮於江由揚子灣入於淮

杭州府

在城北十里其原有三一自城西北三里西湖壩上承西湖之水一自城東北三里德勝壩上承上

塘河之水俱滙於府北六里之江漲橋又餘杭塘河之水亦由江漲橋西出以會於河出北新關橋

至塘棲鎮接石門縣界此漕船經行之道也

錢塘仁和

二縣附郭海寧縣漕船於長安鎮受兌由莊婆堰北達石門縣以會於運河富陽等六縣漕船

俱在杭州府城外湖墅受兌其運河與錢塘仁和二縣同

謹按杭州府運河元末張士誠自塘棲鎮南五里至五林港開河直至江漲橋凡濶二十餘丈其最濶處有三里濶十二里濶之名此所謂新開運河也又名為北關河

嘉興府

在城西由杭州府達石門桐鄉縣界東流經府西
二十七里之槁李亭又東流經學繡塔又東五里
經白龍潭又轉而北達府城外為月河與秀水合
乃出杉青閘受穆溪水為北漕渠又北二十五里
為王江涇又東三里為聞家湖又東北十里接江
南蘇州吳江縣界

嘉興秀水二縣附郭 石門桐鄉二縣俱在運河大路 嘉善

海鹽平湖三縣漕船俱會於府城北達大河

湖州府

在城東苕溪餘不溪之外分流合注而為運河東

北經南潯鎮又東至江南蘇州府震澤縣之震澤

鎮至平望鎮而合於嘉興之運河

烏程歸安二縣附郭德清縣

漕船由烏鎮經爛溪出平望以合於運河長興武康二縣安吉一州漕船俱會於平望鎮以達於

運河

謹按前明湖州府運道由德清而東以達於杭州府之運河今糧艘出新興橋不由故道

浙江通志卷八十二

欽定四庫全書

浙江通志卷八十三

鹽法上

八政以食貨為先鹽居食貨之一考鹽人政令掌
於周官而兩浙鹽官之設昉自漢代

聖朝酌古宜今立法盡善既已

勅修專志奉為禹筴權輿而

睿慮周詳又復隨時損益凡所以惠民恤商者纖悉具

備洵足垂憲於萬年矣志鹽法

越絕書朱餘者越鹽官也越人謂鹽曰餘

史記吳王濞傳高帝立濞為吳王煮海水為鹽以故無
賦國用富饒

通鑑綱目武帝元狩四年冬置鹽鐵官

漢書地理志會稽郡縣海鹽注故武原鄉有鹽官文
獻通考鹽官凡二十八郡會稽海鹽

吳書孫休傳海鹽司鹽校尉駱秀嘉靖浙江通志孫

吳置司法都尉權其利

晉書王允之傳除錢塘令領司鹽都尉

通鑑地理通釋唐天下有鹽之國一百五江南自嘉興至彭水縣十二

唐書食貨志負海州歲免租為鹽二萬斛以輸司農
青楚海滄棣杭蘇等州以鹽價市輕貨亦輸司農
天寶至德間鹽每斗十錢乾元元年鹽鐵鑄錢使
第五琦初變鹽法就山海井竈近利之地置監院

游民業鹽者為亭戶免雜徭盜鬻者論以法及琦
為諸州榷鹽鐵使盡榷天下鹽斗加時價百錢而
出之為錢一百一十

唐書食貨志鹽鐵使劉晏上鹽法輕重之宜以鹽利
多則州縣擾出鹽鄉因舊監置吏亭戶糶商人縱
其所之江嶺去鹽遠者有常平鹽每商人不至則
減價以糶民官收厚利而人不知貴晏又以鹽生
霖潦則鹵薄曠乾則土溜墳乃隨時為令遣吏曉

導倍於勸農吳越揚楚鹽廩至數千積鹽二萬餘石有漣水湖州越州杭州四場嘉興海陵鹽城新亭臨平蘭亭永嘉大昌侯官富都十監歲得錢百餘萬緡以當百餘州之賦自淮北置巡院十三曰揚州陳許汴州廬壽白沙淮西甬橋浙西宋州泗州嶺南兗鄆鄭滑捕私鹽者姦盜為之衰息然諸道加榷鹽錢商人舟所過有稅晏奏罷州縣率稅禁堰埭邀以利者晏之始至也鹽利歲纔四十萬

緡至大厯末六百餘萬緡天下之賦鹽利居半宮
闈服御軍饗百官祿俸皆仰給焉

舊唐書順宗即位有司重奏鹽法以杜佑判鹽鐵轉
運使理於揚州元和二年三月以李巽代之巽大
正其事其堰埭先隸浙西觀察使者悉歸之因循
權置者盡罷之

唐書盧商傳商為蘇州刺史吏以鹽法求贏貲民愈
困商令計口售鹽無常額人便之歲貲反增宰相

上其勞進浙西觀察使

吳興掌故宋制兩浙歲計丁口官散食鹽每丁給鹽一斗使輸錢百六十有六謂之丁鹽錢然其原實始於南唐李氏有國時制為鹽丁之額吳越仿之而宋不復改

宋史食貨志鬻海為鹽曰京東河北兩浙淮南福建廣南凡六路其鬻鹽之地曰亭場民曰亭戶或謂之竈戶戶有鹽丁歲課入官受錢或折租賦皆無

常數兩浙又役軍士定課鬻馬至道三年鬻錢總
一百六十三萬三千餘貫其在兩浙曰杭州場歲
鬻七萬七千餘石明州昌國東西兩監二十萬一
千餘石秀州場二十萬八千餘石温州天富南北
監密鸚永嘉二場七萬四千餘石台州黃巖監一
萬五千餘石以給本州及越處衢婺州天聖中杭
秀溫台明各監一温州又領場三而一路歲課視
舊減六萬八千石以給本路及江東之歙州

宋史張綸傳綸除江淮制置發運副使奏置鹽場於杭秀海三州歲入課百五十萬

宋史食貨志東南鹽利視天下為最厚鹽之入官淮南福建兩浙之溫台明斤為錢四杭秀為錢六廣南為錢五其出視去鹽道里遠近而上下其估利有至十倍者

宋史仁宗紀明道元年廢杭秀二州鹽場

宋史食貨志兩浙轉運使沈立李肅之奏官鹽估高

故私販不止而官課益虧請裁官估罷鹽綱令鋪戶衙前自趨山場取鹽如此則鹽善而估平人不肯冒禁私售官課必溢詔可

宋史食貨志熙寧五年以盧秉權發遣兩浙提點刑獄仍專提舉鹽事異時竈戶鬻鹽與官為市鹽場不時償其直竈戶益困東先請儲發運使錢及雜錢百萬緡以待償而諸場皆定分數錢塘縣楊村場上接睦歙等州與越州錢清場等水勢稍淺以

六分為額楊村下接仁和之湯村為七分鹽官場
為八分並海而東為越州餘姚縣石堰場明州慈
谿縣鳴鶴場皆九分至岱山昌國又東南為溫州
雙穗南天富北天富場為十分蓋其分數約得鹽
多寡而為之節自岱山以及二天富煉以海水所
得為最多由鳴鶴西南及湯村則刮鰾淋滷十得
六七鹽官湯村用鐵盤故鹽色青自湯村及錢清
場織竹為盤塗以石灰故色少黃石堰以東近海

水鹹故雖用竹盤而鹽色尤白秉因定伏火盤數以絕私鬻自三竈至十竈為一甲而鬻鹽地什伍其民以相譏察及募酒坊戶願占課額取鹽於官賣之月以錢輸官毋得越所酤地而又嚴捕盜販者罪不至配雖杖者皆同妻子遷五百里

宋史食貨志兩浙鹽亭戶計丁輸鹽逋負滋廣元祐二年詔蠲之後更積負無以償元符初察訪使以狀聞有司乃以朝旨不行右正言鄒浩極疏其害

明州鳴鶴場鹽課弗登撥隸越州宣和元年樓異
為明州請仍舊且於接近台州給舊鹽五七萬囊
詔曰明州鹽場三昨以施置不善以鳴鶴一場隸
越客始輻輳猶有二場積鹽以百萬計未見功緒
此而不圖東欲取於越西欲取於台改令害法動
搖衆情令狀析以聞

宋史食貨志紹興元年詔臨安府秀州亭戶二稅依
皇祐法輸鹽立監官下察亭戶私煎及巡捕漏泄

之法

建炎以來朝野雜記東南鹽行於江淮舊為江湖六
路漕計蔡京為政始行鈔法取其錢以贍中都自
是淮浙鹽則官給亭戶本錢諸州置倉許商人買
鈔算請舊淮江鹽息歲八百萬緡紹興初才三十
五萬緡而已後朝廷益修其政至紹興末年東南
歲產鹽二萬七千八百六十萬斤每五十斤為一
石六石為一帑鈔錢十有八千紹興四年正月增

三千九月以入納遲罷之

宋史高宗紀紹興十三年蠲浙西貧民逋負丁鹽錢
九月均科處州丁鹽錢二十八年正月遣戶部郎
中莫濛等檢視淮南浙西江東沙田蘆場六月增
浙西江東淮東沙田蘆場租課置提領官田所掌
之二十九年六月罷江浙淮東沙田蘆場所增稅
課

玉海紹興三十二年鹽額浙西路秀州有鹽場十平

江四臨安十浙東路紹興府有場四明州有場六
台州三温州五

建炎以來朝野雜記浙鹽額最多者嘉興八十一萬
石慶元三十九萬石浙鹽一場十竈每竈煎鹽晝
夜六盤一盤三百斤遇雨則停

宋史食貨志乾道六年戶部侍郎葉衡奏今日財賦
煮海之利居其半年來課入不增商賈不行皆私
販害之也且以淮東兩浙鹽出入之數言之鹽額

淮東之數多於兩浙五之一以去歲賣鹽錢數論之淮東多於兩浙三之二及以竈之多寡論之兩浙反多淮東四之三蓋兩浙無非私販故也望遣官分路措置

宋史寧宗紀嘉定三年遣朝臣二人往兩浙路與提舉官議收浮鹽七年除兩浙路茶鹽賞錢八年蠲臨安府茶鹽賞錢

宋史食貨志紹定元年以侍御史李知孝言罷上虞

餘姚海塗地初立鹽窰

元史食貨志兩浙之鹽至元十四年立運司歲辦九萬二千一百四十八引每引分作二帑每帑依宋十八界會子折中統鈔九兩十八年增至二十一萬八千五百六十二引十九年每引於舊價之上增鈔四貫

元史世祖紀至元十九年五月遣浙西道宣慰司同知劉宣等理算各鹽運司出納之數十二月罷諸

鹽司令運官親行調度鹽引二十年四月申私鹽之禁許按察司糾察鹽司二十二年正月立諸路常平鹽鐵都轉運司二十六年十月尚書省臣言沙布迪音便宜增置浙東二鹽司合浙東西舊所立者為七乞官知鹽法者五十六人從之

元史食貨志大德三年立兩浙鹽運司檢校所四五年增額為四十萬引至大元年又增餘鹽五萬引續文獻通考延祐五年曹伯啟遷司農丞奉旨至江

浙議鹽法罷檢校官置六倉於浙東西設運鹽官
輸運有期出納有次船戶倉吏盜賣漏失有罰著
為令

元史食貨志至元五年兩浙運司申中書省云本司
自至元十三年朔立當時未有定額至十五年始
立額辦鹽十五萬九千引自後引增十倍價增三
十倍課額愈重煎辦愈難兼以行鹽地界所拘戶
口有限前時聽從客商就場支給設立檢校所稱

檢出場鹽帑又因支查停積延祐七年比兩淮之
例改法立倉綱官押船到場運鹽赴倉收貯客旅
就倉支鹽始則為便今經二十餘年綱場倉官任
非其人惟務掊克況淮浙風土不同兩淮跨涉四
省課額雖大地廣民多食之者衆可以辦集本司
地界居江枕海煎鹽亭竈散漫海隅行鹽之地裹
河則與兩淮隣接海洋則與遼東相通番舶往來
私鹽出沒侵礙官課雖有刑禁難盡防禦鹽法隳

壞亭民消廢其弊有五如蒙特賜奏聞選委德望重臣與拘該官府叅酌時宜更張法制惠濟黎元庶望大課無虧見為住煎餘鹽三萬引差人齎江浙行省咨文赴中書省請照詳焉

元史順帝紀至元元年十二月增設嘉興等處鹽倉二年杭州嘉興紹興温州台州等路各立檢校批驗鹽引所

元史食貨志至正二年十月中書右丞相托克托平章

特穆爾達實等奏兩浙食鹽害民為甚江浙行省
官運司官屢以為言擬合欽依世祖皇帝舊制除
近鹽地十里之內令民認賣罷見設鹽倉網運聽
從客商赴運司買引就場支鹽許於行鹽地方發
賣革去派散之弊及設檢校批驗所四處選任廉
幹之人直隸近司如遇客商載鹽經過依例稱盤
均平帑法批驗引目運司官常行體究又自至元
十三年歲辦鹽課額少價輕今增至四十五萬額

多價重轉運不行今戶部定擬自至正二年為始
將兩浙額鹽量減一十萬引俟鹽法流通復還原
額散派食鹽擬合住罷有旨從之

明會典洪武元年置兩浙都轉運鹽使司定歲辦鹽
數每引四百斤給工本米一石

續文獻通考兩浙都轉運鹽使司轄嘉興松江寧紹
溫台四分司鹽場三十五處歲辦鹽二十二萬四
百五十七引二百斤零嘉靖浙江通志凡為場三

十五為團五百有一為丁七萬四千四百四十有
六丁皆給灘蕩授煮器率辦鹽一引給工本米石
名山藏兩浙鹽運司鹽課之司二嘉興分司鹽課之
司五松江分司鹽課之司八寧紹分司鹽課之司
十二溫台分司鹽課之司八批驗之所四杭紹嘉
溫行鹽之地杭紹寧台衢處嘉湖嚴金溫蘇松常
鎮徽廣信廣德歲解金於太倉所派邊甘肅延綏
寧夏固原山西神池等堡

明會典洪武三年令浙江等布政司併直隸府州縣
官民人等戶口食鹽各隨地方徵收歲用糧多處
徵米用糧少處徵鈔十七年定兩浙鹽工本鈔每
引二貫五百文二十三年定兩浙各竈戶每丁歲
辦小引鹽丁六引引重二百斤復鹽工丁半之其
餘工丁四引

明世法錄洪武二十七年議准兩浙運使石堰場新
漲沙地除通洩鹽水併原係辦鹽採薪地畝照舊

起科分撥除豁外其上中二則實該陞科田五萬餘畝俱自二十六年為始每畝科糧五升五合折銀三分徵解運司貯庫遇有竈戶逃移復業及年時豐歉量支賑恤

史槩宣德元年六月仍命中鹽人改鈔輸米六年六月允溫州府商稅收鈔

續文獻通考宣德四年令兩浙負難竈丁輸原額鹽課照舊收納其有餘鹽者不許私賣俱收貯本場

運司造冊發附近州縣每一小引給米麥二斗

明會典正統二年裁革寧波府岱山蘆花二場鹽課
歸併大嵩場鹽課司催辦舊浙江通志五年併昌
國場於穿山設下砂二三場

嘉靖浙江通志正統三年用侍郎周忱議以竈去場
三十里者為水鄉竈戶不及三十里者為濱海
丁水鄉丁歲出米六石給濱海丁代煎

明會典正統五年令兩淮兩浙長蘆運司每歲額辦

鹽課以十分為率八分給與守支客商二分另為收積在官候邊方急缺糧儲召中以所積見鹽人到即支謂之存積其八分年終挨次給守支客商謂之常股凡中常股價輕存積價重

舊兩浙鹽志兩浙年額引鹽四十四萬四千七百六十九引一百四十九斤二兩內常股鹽三十一萬一千三百三十八引一百六十四斤六兩二錢存積鹽一十三萬三千四百三十引一百八十四斤

一十一兩八錢

明會典景泰元年令增兩浙存積鹽為六分又令各處商人引鹽出遷延三月者拘收入官

舊兩浙鹺志成化七年令兩浙運司各場存積鹽課仍舊止作四分常股增為六分

嘉靖浙江通志成化十年巡撫右副都御史劉敷以濱海逋課累水鄉疏改水鄉鹽引折銀三錢五分場各輸於其長運司會而輸戶部備邊用此水鄉

輸銀之始十二年詔覈水鄉蕩價解運司此草蕩
徵銀之始十八年增置天賜溝場

嘉靖浙江通志成化二十年御史林誠以嚴鹽多耗
疏令濱海竈鹽並許輸半價浙西引三錢五分浙
東引二錢五分歲十月輸京師此濱海本折色鹽
之始二十一年增邊商浙鹽價每大引輸銀一錢
六分松江府知府樊瑩疏請以蕩價抵水鄉鹽課
之半立蕩戶收之餘半於各縣秋糧加耗餘米帶

徵而丁盡歸有司應民役此州縣包補水鄉額鹽之始

嘉靖浙江通志弘治元年侍郎彭韶疏減濱海折半鹽價浙西引輸三錢浙東引一錢七分五釐二年疏鬻兩浙餘鹽引價一錢四分此本處賣鹽之始又疏減水鄉歲課引輸銀三錢濱海歲課常股引輸銀一錢五分存積輸鹽如故三年御史張文疏令濱海竈丁去場三十里內者煎辦三十里外者

輸銀視水鄉浙西引三錢浙東引二錢

明憲章錄弘治五年八月令兩淮兩浙鹽運司鹽引俱於運司招商開中納銀類解戶部太倉以備邊儲國初鹽課俱於各邊開中上納本色米豆商人於近邊轉運本色以待開中至是戶部尚書葉淇因商人赴邊納糧價少而有遠涉之虞在運司納銀價多而得易辦之利遂奏准商人引鹽悉輸銀戶部送太倉銀庫收貯分送各邊鹽銀積至一百

餘萬兩

嘉靖浙江通志弘治十二年廢寧台二批驗所御史
監章增餘鹽價引一錢八分都御史王瓊御史邢
昭繼增之引價二錢

嘉靖浙江通志正德六年增邊商浙鹽價每大引輸
銀一錢八分八年減餘鹽價仍一錢八分

明世法錄正德九年奏准兩浙鹽每引二百斤許帶
餘鹽五十斤連包索五十斤共三百斤為一引十

三年議准運司所屬許村場額徵本色鹽不及百斤者照浙東西折鹽管價徵銀解部

嘉靖浙江通志嘉靖六年增邊商浙鹽價每大引輸銀四錢七年御史王朝用疏令瀕海折色鹽水鄉竈鹽引輸銀二錢三分七釐貯運司而以二錢給商買鹽曰買補其三分七釐暨諸割沒餘鹽價仍輸京師此給商買補之始

明世法錄嘉靖八年題准兩浙每正鹽一引連包索

二百五十斤原定四錢近減作三錢五分餘鹽通融二百斤為一引嘉興批驗所銀五錢杭州批驗所四錢五分紹興批驗所四錢溫州批驗所二錢正鹽照舊上納本色糧草餘鹽不必開邊照舊運司納銀解部轉發各邊糴買客兵糧草其甘肅險遠止開淮浙二鹽浙鹽再減五分每引銀三錢

明世法錄嘉靖十一年奏准浙東鹽額五萬二千五百引引少鹽多浙西額鹽一十四萬六千四百引

引多鹽少派場之時於浙西數內改出四萬六千九百七十四引派與浙東疏通鹽法

舊兩浙鹺志嘉靖十二年題准清理竈丁均分蕩地將實在鹽課通行各場照依見在丁數均勻辦納其草蕩先爲豪強兼併逐一查出均撥聽巡鹽御史每五年一次親詣各場將竈丁逐一清審事故者開除成丁者僉補先年有將竈蕩丈量入民額者有徵銀充兵餉者有司見蕩成熟輒議陞課今

後新漲荒蕩及開墾熟蕩盡數分給各竈煎辦計畝徵銀不許有司容令部民妄行爭奪

明世法錄嘉靖十三年題准永嘉場衝壞沙灘逃亡竈丁折銀鹽課查槩縣民田地池均派包補隨糧徵收發場起解

舊浙江通志嘉靖十六年題准兩浙官商不到之處立爲山商鉛山弋陽貴溪永豐靖江昌化浦江武義東陽義烏湯溪永康建德桐廬壽昌慶元宣平

縉雲景寧雲和二十縣每程一張納銀六錢餘杭
富陽臨安新城嘉興秀水嘉善崇德桐鄉德清武
康諸暨新昌嵊縣奉化泰順青田十七縣每程一
張納銀四錢三分其餘坐場縣分容令竈丁肩挑
易賣仍修復松江分司令分司官駐劄督課二十
年題准台州府長亭黃巖杜瀆三場引目一票作
為一引每票照鹽三百斤納銀九分

舊兩浙鹽志嘉靖二十四年題准兩浙歲辦水鄉鹽

課照舊折價解部存留在場鹽課徵收折色解貯
運司給商自行下場買鹽聽掣

明世法錄嘉靖二十六年題准兩浙運司天賜場原
額引目俱改派仁和許村二場輪次買補完日就
於二場打引截角運赴杭州批驗所掣放

史槩嘉靖三十四年十一月減兩浙鹽課

舊浙江通志隆慶六年奏准寧波府所轄五縣松江
所轄二縣共一十四場俱無住賣商引又未議行

票鹽令僉選牙埠置立簿票每票一張照鹽三百斤納銀一錢二分

舊兩浙鹺志萬厯七年十一月戶部覆准永嘉等場改認仁許二場買補引目減去引價一錢五分止追銀二錢浦東青浦袁浦改認下砂青村買補引目減去銀三分止追銀一錢四分蘆澱場改認西路買補引目減去銀四分止追銀八分恐京解不敷將紹所餘鹽每引加銀一分及將續增稅票沙

蕩等銀抵補前數題減仁許等場搭派折色銀兩
議將浙東場分引目每引加增餘鹽銀一分續據
商人吳用和等呈詞將紹所引鹽每引加耗鹽十
斤以補多徵餘鹽之數杭州等所不得援此例
舊兩浙鹺志萬厯四十二年四月陝西道御史劉廷
元疏乞將兩浙新陞蕩稅立賜全免奉旨令新增
蕩稅一萬八十有奇減去一半

東陽縣志天啟間尚書許弘綱建議將原裁弓兵工

食抵扣鹽斤聽民肩挑勿禁於是台鹽盛行而貧民皆得自食其力後邑商以課額具呈所司而復其禁

上海縣志崇禎時都運司張繼孟蠲無業丁銀又令水鄉與濱海一體僉充催役

國朝

順治三年正月戶部為禁私鹽以通商定經制以起課等事議覆兩浙巡鹽御史王顯議得鹽法之

弊莫甚於私販今議擇廉幹事簡官常司捕緝嚴防則私鹽可杜應令鹽臣實意舉行至起課經制查兩浙舊額大引四十四萬四千七百六十九引每引原重三百觔今各運司鹽法俱以二百觔為一引則兩浙當以二引分三引共該行小引六十六萬七千一百五十三引一百觔引制既定則課額亦可因之以定兩浙引價每引三錢五分共銀一十五萬五千六百六十九兩一錢五分又每引

納餘鹽課銀一錢八分五釐共銀八萬二千二百八十二兩二錢六分五釐二項通共銀二十三萬七千九百五十一兩四錢一分五釐但查明時額解舊餉原係一十四萬五千兩除將餘課銀八萬二千二百八十二兩二錢六分五釐起解外尚缺額銀六萬二千七百一十七兩七錢三分五釐向以雜項湊解補足此外又有給商庫價等項錢糧應各開款數報部酌奪至於票鹽功績鹽不係額

引之內所當照例改票行引以杜奸弊以上鹽觔額例新定經制開載甚明自宜照例奉行可也奉旨是依議行

順治三年九月戶部為申明解驗之規等事覆兩浙巡鹽御史王顯題稱浙鹽濱海私販繁多舊設杭嘉紹溫等四所四季委官專司解驗杜絕私鹽一切夾帶有禁影射有禁越渡漏解有禁借引重照有禁以及觀望耽延違限停泊莫不有禁孟起

季竣過限銃毀法綦嚴也今各商急公者固多而營私者亦復不少每遇掣期或觀望以待市價之高或漏掣以釀重照之弊或越渡以開影射之門一繩以銃毀之法則藉口傷本不加以懲創之規則挨季墮歷今臣立法掣鹽過限半月者銃引目十分之二過限一月者銃引目十分之五此外免銃則各商既憚銃毀之法又懷免銃之仁庶掣放依期等因到部查鹽引掣驗原有定期過限卽為

銚毀此舊例也今鹽臣酌定日期分別銚毀以示
招徠相應允從奉

旨依議

順治四年六月兩浙巡鹽御史王燮題為引課規
制未定欸項宜清等事臣查部劄開兩浙引價銀
一十五萬五千六百六十九兩一錢五分又開舊
餉銀一十四萬五千兩新舊參差致有缺額夫引
額鹽觔既已奉行新制而餘鹽加課仍欲取盈舊

數此固不能臣謂欲求畫一總不越部劄中引制
既定課銀亦可因之以定二語夫每引三錢五分
為率此無論四十四萬與六十六萬俱可按引而
計也就中分別正雜二項不因引課起者應列為
雜項因引課起者總歸於正項除明季續加各款
遵奉

恩詔蠲免外如各縣場課稅銀一萬八千八百四十一
兩五分係給商庫價之餘又功績鹽銀七十三百

一十五兩船物銀四百兩水手銀一百兩係派之
各州縣者應作雜項如庫價銀九萬六千九百五
十九兩六錢四分二釐卽各場竈水鄉蕩價銀兩
舊例邊商中粟於邊支鹽於場每引各竈給鹽二
百觔各竈折價以給邊商原屬引課應歸正項引
價銀四萬四千四百七十六兩九錢原屬引課應
歸正項餘鹽銀八萬二千二百八十二兩二錢六
分五釐原屬加鹽八十觔者今已減觔增引應作

引課以歸正項加餘銀一萬四千九百二十七兩
六錢四釐亦屬加鹽者應作引課以歸正項代票
引銀一萬四千四百五十九兩四錢五分係代票
行引者今票已盡草原屬引課應歸正項漕課銀
四千兩因溧陽原食淮鹽後改食浙鹽而增者亦
屬引課應歸正項靖江包課銀一百八十兩四錢
三分原屬引課應歸正項合計正項銀共二十五
萬七千二百八十八兩零即以六十六萬七十有

奇之引計之尚有浮額與其頭緒紛繁多開名目
曷若統歸畫一總撤相符臣謹具題奉

旨該部知道

順治十三年五月兩浙巡鹽御史石維崑題為改
設批驗所官稽覈引目事松江所原名蔣涇埠向
係行銷票引故未設有批驗所官今

皇清鼎建以來釐剔漏弊裁票行引凡引鹽必由各所
驗掣方許運賣所以杜重照影射之奸前鹽臣祖

建明疏內有松江批驗所地隣產鹽之鄉各場所
官斷難乏員之語今查下砂場原設大使副使各
一員該場催課撫竈留大使一員已堪足用副使
似屬贅員今擬將副使改為批驗所大使廢地無
曠官官無曠職轉移之間而鹽法大有裨益矣奉
旨依議

順治十七年五月兩浙巡鹽御史余司仁題為懇准
援例變通等事兩浙額行小引六十六萬七千一

百五十三引近復加引十萬道若必按引辦課則額引不能全銷額課奚從取足今各商援兩淮減餉銷引之例行之兩浙其法納兩引之課止行引半之鹽以引半之鹽併作一包以一包之鹽兼銷兩引則鹽少易銷在各商鹽減雖有虛賠之課而包併亦省腳價之費公私兩利似可允從奉

旨該部議奏隨經戶部覆准奉

旨依議

康熙十三年二月戶部為巡鹽例有罪贖等事議
覆兩浙巡鹽御史胡三祝查贓罰銀兩鹽法考內
刊定額數各差御史將此項銀兩每年俱照定額
全完但私鹽犯多則罪贖銀多犯少則罪贖銀少
儻以定額追徵所差之官恐碍考成以致派徵亦
未可定嗣後各差不必額定起追惟照現獲私販
之多寡據實題報如有獲多報少情弊或被督撫
查明題叅或被科道指實糾劾即治以貪贓之罪

可也奉

旨依議

康熙十八年戶部為請定遇閏增課等事議覆給事中余國柱條奏以遇閏月加引增課等因准行在案康熙十七年閏月十九年閏月兩浙引課遵照循例徵解康熙二十年十二月欽奉

恩詔嗣後閏月增課停其徵收

康熙二十六年十一月戶部為攤課代輸年久等

事覆兩浙巡鹽御史常翼聖疏稱兩浙溫台寧各
場遷置界外課銀無着部議將無徵銀暫令內地
各場均攤徵補歷經多年今值

大赦凡康熙十三年以後加增稅銀槩蒙豁免伏乞

恩詔普頒將攤課悉與減除等因相應悉與減除可也
奉

旨依議

康熙三十四年十二月戶部為謹就管見等事議

覆江西道御史任觀瀛以票引改行正引一疏行
令浙閩總督浙江巡撫會同巡鹽御史查明定議
去後隨經總督郭世隆等疏稱仁錢二十二縣皆
緣逼近場竈不便槩行正引沿海窮黎皆無耕種
恒產又無別業謀生惟賴領引貨賣易米度日今
若議設鹽店槩改商銷則數萬貧民謀生乏策相
應仍循舊制等因前來應將御史任觀瀛條奏票
引改行正引之處無庸議可也奉

旨依議

康熙三十八年四月浙閩總督郭世隆為萬商感
沐

皇仁等事查兩浙鹽課額徵銀四十萬兩自康熙十六
年奉文加增銀六萬二千七百餘兩歷年照額徵
解今兩淮加增鹽課蒙

皇上軫念商民恐致匱乏

特沛綸音將加增四十萬兩內豁免二十萬兩今兩浙

加增課銀應否豁免出自

聖恩本月十九日奉

旨這所增銀兩着免一半該部知道

康熙五十五年閏三月戶部為請嚴保甲等事議
覆兩浙巡鹽御史諾米疏稱兩浙州縣現行保甲
之法更申以嚴察私鹽之條責任地方官力行查
緝使總保里民互相稽察等因應如該御史所題
嚴飭所屬行鹽地方該管官員將奸究聚眾興販

私鹽者令總保里民互相稽察有能拏獲者照律給賞儻有容隱徇縱等情發覺之日照律治罪可也奉

旨依議

雍正二年七月兩江總督查弼納為請將鎮郡改食淮鹽等事竊查鎮江舊食浙鹽浙鹽產於松江沿海鹽臣盤解之後船載赴鎮六七百里道路既遠脚費自多官鹽所以價貴淮鹽產於如臯通泰

等處去鎮江止隔帶水私販片帆渡江卽至鎮郡
脚價無幾比浙鹽價值甚賤且浙鹽灰多味苦而
淡淮鹽味潔而鹹其價又賤民情惟利是趨避浙
鹽之貴而偷買淮私勢所必至淮私至鎮透越甚
易大江遼濶稽查甚難鎮江私販既多遂流行內地如
句容溧陽高淳等處無非私鹽充斥矣欲絕鎮江
買私莫若將鎮江所屬三縣改食淮鹽鹽臣在儀
真盤掣之後船載渡江相隔百有餘里抵鎮甚易

則價自賤官鹽既賤則民不食私梟棍何從射利
將不禁而自散矣鎮江既食淮鹽則鎮江府屬所
行鹽引照數即令淮商承充其應納鹽課銀兩即
令淮商交納如浙引鹽課與兩淮相同則令各商
照浙例完納若浙課比兩淮為輕則令淮商照浙
例完納一轉移間於

國課民生均有裨益矣奉

旨鎮江之鹽起初舍近而就遠者其中或有不便情由

所致爾與謝賜履黃叔琳噶爾泰公同詳確議奏欽
此欽遵移咨兩浙鹽政謝賜履浙江巡撫黃叔琳兩
淮巡鹽御史噶爾泰會同布政司鹽驛道遵照妥
議會詳隨據浙江布政司佟吉圖兩浙鹽驛道王
鈞詳稱查兩浙行鹽辦課原以江南鎮江為界鎮
屬行鹽隸於浙省者揆厥畫疆之始蓋緣淮以瓜
洲為門戶浙以鎮江為咽喉有大江以為之限則
彼此不相侵害原屬因地制宜是以京口奉

旨設立盤鹽官廳需責防守稽查以杜淮私侵浙之患
歷年以來兩浙引課從無虧缺者職是故也今兩
江督憲奏請改食淮鹽欽奉

俞旨鎮江之鹽起初舍近而就遠者其中或有不便情
由所致仰見

聖主睿鑒如神靡遠弗届本司道不揣蠱測竊謂欲禁
淮私而將鎮屬三縣改食淮鹽恐販徒借官行私
連艘飛越并奸商飛渡夾帶影射重照之弊更難

稽查且梟販尚能私渡大江蘇常之地支河小港繁多尤易透入至於價值久經核定飭遵味之鹹淡水土相宜況屢次嚴飭地方文武實力巡查梟販自可屏絕鎮江改食淮鹽在兩淮幅員遼濶增此一府不足見多而在浙地失此大江之界將來蘇常以西淮私透入不無侵越之慮兩淮兩浙總屬引地淮商浙商總屬辦課可否仍循舊界疏引行鹽則淮浙諸商各安其業而永保

國餉於無虧矣等因據詳移會隨准兩淮巡鹽御史
移開此案江督已將仍舊行銷浙引毋庸改食淮
鹽緣由奏明相應移覆查照施行

雍正三年十一月戶部為欽奉

上諭事覆署理兩浙鹽政浙江布政使佟吉圖疏稱兩
浙定例每引行鹽二百五十觔又有鹽差并筆帖
式應得公費銀共二錢五分每引予鹽三十五觔
前經刑部尚書張廷樞等察審原任鹽差哈爾金

一案謂公費出於鹽觔已將加鹽三十五觔之處
據實奏


聞業蒙

聖祖仁皇帝俞允部議免其禁革在案臣查每引除充納
正課之外再輸鹽差并筆帖式公費分旋資本既
多獲利自少臣仰體恤商至意乞照前部議每引
加鹽三十五觔免其禁革具題前來查先經尚書
盧詢條奏加引不加額一案行令兩浙御史照長

蘆之例每引量加鹽觔之處詳加確議在案入查
康熙五十九年刑部尚書張廷樞等審明哈爾金
一案經從前臣部議覆將多給商人三十五觔之
鹽暫停禁止亦具題在案今既稱兩浙商人資本
微薄若照長蘆之例每引加鹽五十觔誠恐引課
有虧請照從前部議每引加鹽三十五觔等語應
如所奏准其每引仍舊加鹽三十五觔仍行該鹽
政將地方之大小銷鹽之多寡據實查明酌量配

銷造冊報部查核如有鹽多引壅銷不能完之處
亦據實題報可也奉

旨依議



浙江通志卷八十三